



1613

APOLOGIE

OV DE FENSE POVR

LE MARIAGE DV ROY ET DE
Madame sa sœur, contre le blas-
me de ceux qui reprouuent l'al-
lianced'Espagne.

Dediée au Roy.

24



A PARIS,

Chez la vefue JEAN REGNOVL,
ruë du Foin, près Sainct Yues,
à la Vigne d'Orfin.

M. DC. XV.

Avec Permission.

THE NEWBERRY
LIBRARY

Case


F

39

1320

1619 502

5101
IM P R I M E' par permission de
Monsieur le Lieutenant Ciuil,
contenant deffenses à tous Impri-
meurs autres que ladicte le Cointe
d'imprimer ladicte Apologie sur pei-
ne de confiscation & d'amende.



AV ROY.

SIRE,

La perfection d'un bon Pillote ne consiste pas seulement à s'opposer vertueusement aux fureurs de la tempeste pour sauuer son vaisseau lors qu'il est agité de la tourmente. Sa prudence est de le fortifier de plus en plus & munir de toutes instructiōs necessaires pour sa deffense & seureté à l'aduenir. Ceste grande Royne vostre mere ne s'est aussi contentée d'auoir rendu ce premier deuoir à V. M. & à la France, en ayant conserué la nef par sa vertu & generosité lors que l'orage & la tempeste l'ont assaillie: Elle a iugé estre à propos (pour auoir l'honneur entier d'un prudent Pillot-

te) de pourvoir à l'autre par le ferme lien
d'une double alliance entre ces deux puis-
sans Royaumes de la France & d'Espa-
gne, afin de preuenir les maux que les trou-
bles du passé leur ont apportez, & d'asseu-
rer plus que iamais la paix & le repos de
leurs peuples. Toutesfois c'est chose estran-
ge de voir la licence insupportable de plu-
sieurs particuliers blasmant outrageusemēt
ceste loüable resolution: Mes yeux n'ont
peu lire leurs escripts, ny mes oreilles ouyr
leurs discours scādaleux & satiriques sans
en estre offencez; Ils m'ont obligé de respon-
dre, non par inuectiues ny par passion aux
obiections de leur blasme, mais par les rai-
sons veritables qui decourriront aux peu-
ples le but de leurs pretextes feints & simu-
lez, & mettront leurs calomnies au iour
pour recognoistre l'erreur auquel ils ont de-
siré les plonger. Si ie n'ay fait en cela tout ce
qui seroit à desirer, Il plaira à V. M. d'a-
voir toutesfois agreable l'entiere affection

§

que ie desire tesmoigner au bien de son seruice & au repos de son Royaume, qui sont les deux poincts principaux ausquels tous les bons François doiuent tendre: & sur lesquels aussi est appuyé le discours de ceste petite Apologie que vous presente en toute humilité,

SIRE,

Vostre tres-humble & tres-fidelle /ubject & seruiteur, N.D.S.

A P O L O G I E

O V D E F E N S E P O V R

*le mariage du Roy & de Madame sa
sœur, contre le blasme de ceux qui re-
prouuent l'alliance d'Espagne.*



A France qui par l'ethi-
mologie de son nom, a ie
ne sçay quoy de plus franc
que les autres nations; en-
gédre aussi des esprits semblables, qui
toutesfois degenerent souuent de la
franchise loüable en laquelle ils sont
nez, quand au lieu de la borner & re-
gler au poinct de la raison ils la cōuer-
tissent en vn vice apparent par l'excès
d'vne licence trop effrenée de medire
digne de blame & punition, faisant
éclore des fruiets hors leur saison res-
sentans le goust d'vne trop libre hu-
meur: tāt qu'à peine l'innocēce la plus

notoire se peut affrâchir de leur mes-
disance ; N'espargnât mesmes souuér
par leurs discours ny par leurs escrits
les personnes sacrées de leurs Princes.
Nous n'en voyons que trop d'exem-
ples en nostre siecle de iour à autre,
par tant de bruits nouveaux faux
& inuentez , tant d'escrits calum-
nieux diuulguez , qui s'attaquēt non
seulement aux particuliers : mais à la
personne de ceste grande Royneme-
re du Roy , prenant plaisir à blasmer
& deprimer ses actions , qui n'ont
tendu qu'au bien & repos du Ro-
yaume, principalement la sincere in-
tention qu'elle & Messieurs du Con-
seil de leurs Majestés ont euë, en trai-
tant le mariage du Roy & de Mada-
me, avecques le Prince & Princesse
d'Espagne.

Mais si tels nouveaux censeurs de
l'Estat se sont licentiez de blasmer in-

iustement la resolution de ce traicté
 faict par ceste Auguste Princesse, Il
 me iera permis (la deffense estant plus
 fauorable que l'accusation) de def-
 fendre la cause iuste & legitime, ie la
 dis sienne, par ce qu'ils semblent luy
 vouloir imputer quelque faute enor-
 me au traicté de ceste alliance, comme
 si elle en ce faisant s'estoit oubliée du
 deuoir de mere & de Regente au pré-
 judice du Roy & du Royaume : Et
 toutesfois, à le bien prédre, & les cho-
 ses examinées sans passio, on y remar-
 quera sa prudence, ne s'en pouuant
 rencontrer en la Chrestienté de plus
 conuenable & honorable de part &
 d'autre : Qu'elle peut mesmes avec le
 temps apporter beaucoup d'auanta-
 ge à la France, selon les changemens
 & accidens qui peuuent arriuer aux
 Estats d'Espagne, & nulle diminu-
 tion au nostre ny subiect de crainte
 que

que par opinion & fantaisie telle que les Hypochondriaques conçoient quelques fois en leur esprit, estans blessez en leur imaginatiue.

Ce que i'espere monstrier à ceux qui ne seront preuenus de passion: ou qui ne se sentiront interessez par l'alliance de ses deux grands & puissans Royaumes. Car pour ceux-là où la passion domine, elle priue le iugement: Et pour ceux-cy où il iroit de leur interest particulier, ils ne recognoistront iamais la verité à leur prejudice, n'y ayans de pires sourds que ceux qui ne veulent point entendre. Leur protestant toutesfois que ma plume ne sera guidée d'aucun traict d'adulation en la faueur de ceste grande Princeesse, de laquelle ie n'ay l'honneur d'estre cogneu, ny par sympathie ou correspodance que i'aye avec l'Espagnol, duquel ie desire aussi peu

la domination que tout autre bon François. Mais pousse d'une naïfue & sincere affection telle que les gens de bien doiuent apporter à deffendre simplement l'innocence & la verité; telle aussi qu'ils doiuent auoir à l'honneur & grandeur de leur Roy, & au bien & repos de leur patrie, qui sont les deux poincts sur lesquels i'entends comme sur deux fermes colonnes bastir le fondement de mon discours qui ne pourroit autrement estre trouué iuste ny legitime.

Sur ce fondement, nous dirons donc pour venir aux faicts de leur plainte & accusation qu'il faut examiner en premier lieu, qu'elle a esté l'intention de la Royne & de Messieurs du Conseil en traitant ceste alliance. Et s'ils ont tendu à quelque dessein pernicieux au prejudice du Roy & du Royaume, comme ces

censeurs ont osé publier & diuulguer, afin de la faire reietter d'un premier abord par ceste mauuaise impression, sans considerer si elle est vtile ou dommageable, honorable ou deshonorale au Roy & à la Frâce.

De raison pertinente ny apparence sur laquelle ils puissent fonder ceste mauuaise intention, ie n'en ay peu apprendre sinon que sourdement ils ont tasché de mettre les peuples en deffiance de la Royne, & d'imprimer en leurs cœurs qu'elle auoit de la sympathie & intelligence avec l'Espagnol, poussée d'affection particuliere en son endroict pour aduancer ses affaires au prejudice des François.

C'est le mesme bruiet & artifice (comme dit l'histoire de France) dōc vsoient ceux qui desiroient rendre odieuse la Royne Blanche mere du Roy S. Louys fille d'Alphonse Roy

de Castille pour empescher sa regence, qu'elle voudroit se gouuerner par ceux de sa nation, les aduancer aux charges & authoritez auprejudice des François. Toutesfois n'en faisant rien, elle tesmoigna qu'ayant changé l'air de l'Espagne à celuy de la France, elle en auoit aussi changé l'affection, employant toute sa vigilance à faire bien nourrir & sagement instruire le Roy son fils, & en la conseruation de son Estat en repos & tranquillité, au contentement de son peuple.

Ceste Auguste Princeesse, comme bonne & naturelle mere a faict le mesme à l'endroiect du Roy & de ses autres enfans pour le regard de leur nourriture & sage instruction à l'honneur de la vertu & pieté. Et comme bonne & vraye mere de la patrie à l'endroiect du Royaume en la conseruation & repos vniuersel d'iceluy. En

ayant conduit le gouuernail avecq^t
 tant de prudence & generosité qu'elle
 semble auoir miraculeusement ar-
 resté les flos & la tempeste qui par lo-
 pinion commune la sembloient me-
 nasser du naufrage, ayant exposé sa
 personne au plus fort de l'orage pour
 estouffer ce monstre de guerre ciuil-
 le fait poser entierement les armes &
 mesnage cōtre l'esperance humaine
 la tranquillité publique, sans auoir rien
 traité ny negocié dedans ny dehors
 le Royaume au prejudice ou dimi-
 nution d'iceluy.

Quelle apparence donc en ceste
 suspicion & calomnie? qui la peut di-
 re ny pēser sans crime & sans impieté?
 Qui pourroit croire aussi que ceste
 grande Royne plaine de trionfes
 voulust apres tant de palmes & de
 lauriers acquis enseuelir sa gloire
 aux ruines du Roy son fils, & aux

nostres, trahir son propre sang, voire elle-mesme, ayant plus d'intérest en leur conseruation que nul autre, ne pouuant ignorer que de la personne dudit Seigneur Roy & de la manutention de son Estat depend la grandeur de son honneur & autorité : & que ce sont les deux joyaux plus pretieux, lesquels joints à ses rares vertus, luy donnent ce beau lustre & l'esclat plus apparent entre toutes les Princesses de l'Europe.

Voila donc pour leuer le soupçon de ce premier poinct. Car tout ainsi que le feu jeté en grande eau s'esteint incontinét, ou que les flots qui heurtent le rocher se dissoluent facilement, la calomnie aussi qui attaque la personne de grande reputation ornée d'une rare & excellente vertu, comme ceste grande Royne trouue

le fort d'une innocence & integrité
 qui la fait euanouyr & dissiper en vn
 moment; Considerant les vertueuses
 actions & sages comportements du
 passé consacrez à l'immortalité tous
 contraires à ceste medilance, lesquels
 font assez recognoistre iugeant la
 cause par les effects & la bonté de
 l'arbre par le fruit, Que son cœur est
 vrayement François, & que person-
 ne n'ayant tant d'interest à la conser-
 uation du bien & de l'honneur du
 Roy son fils que la mere propre: El-
 le n'a desiré ceste alliance que pour
 apparager & allier ces deux grands
 Roys selon le rang & la grandeur de
 leurs maisons, se fortifier l'un-l'autre
 & maintenir la paix pour le bien &
 repos de leurs Royaumes, voire de
 toute la Chrestienté.

Pour Messieurs du Conseil qui
 ont si fidelement contribué par leurs

bons & salutaires aduis en la conser-
 uation de l'Estat & tranquillité publi-
 que. Quelle apparence pour recom-
 pence de leurs seruices les taxer de
 trahison & infidelité? Je demande-
 rois volontiers à quelle intention ils
 vseroient de perfidie contre leur Roy
 & leur patrie pour se perdre eux-mes-
 me? Est-ce pour esperer plus d'hon-
 neur & de biens d'un estrange qui
 n'a force ny vertu en France, ny es-
 perance d'en auoir? Quel loyer doit
 attendre la vertu, fidelité & l'ogee ex-
 perience qui ont esleué aux grandes
 charges ces prudents Ministres de
 l'Estat, & faict juger dignes des sa-
 crez Conseils de leurs Majestez, si
 pour auoir bien & fidellement seruy
 leur Roy & la France pendant sa mi-
 norité, on reçoit auourd'huy les pas-
 sions & inuectiues de tels censeurs
 & medisans pour iuges de leur meri-
 te &

re & integrité? L'enuie & calomnie
 faillent souuent la vertu & les gens
 de bien: Caton tenu pour tel entre
 les Romains, & Aristide entre les
 Atheniens n'en furent pas exempts.

Ils objectent en second lieu, que la
 Roynne ne pouuoit & ne deuoit trai-
 ter ny obliger sa Majesté pendant sa
 minorité, ny moins encor aduancer
 le mariage (supposant estre son inté-
 tion) auant qu'elle ayt atteint l'aage
 capable de le contracter: Lequel aa-
 ge, suiuant la loy des Romains, a esté
 réglé par nos Majeurs, & mesmes par
 les cōstitutiōs de l'Eglise à douze ou
 quatorze ans, selon la diuersité du se-
 xe & a esté appellé l'aage de puberté.

A quoy nous respondons sur le
 premier poinct, que la Roynne pre-
 mieremēt n'a suiuy en cela que la co-
 gnoissance qu'elle auoit de l'aduis &
 resolutiō du feu Roy sur ce subject.

Secondement que comme mere
 & Regente elle a peu & deu faire le-
 dit traite', & qu'elle en a eu le pou-
 uoir & autorité, l'ayant iugé estre
 vtile & cōuenable pour le bié du Roy
 & de son Royaume: d'autant que par
 la disposition des loix, non seulemēt
 les peres, mais les tuteurs & curateurs,
 desquels le pouuoir est en effect com-
 pris sous le titre de la Regence (qui
 toutesfois a d'autres marques de plus
 grande puissance & autorité) sont
 tenus de procurer le bien de leurs pu-
 pilles commis en leur garde, peuuent
 contracter pour eux & autoriser
 leur consentement qui mesmes pour
 les promesses d'un futur mariage
 peut estre receu à l'aage de sept ans,
 auquel aage nous lisons que Blanche
 Comtesse de Vallois sœur de Philip-
 pes de Vallois fut fiancée à l'Empe-
 reur Charles quatriesme du nom.

Aussi ce traité faict par la Royne, comme estant valable & légitime a esté approuué, tant par Monseigneur le Prince premier Prince du Sang, que par Messieurs les autres Princes, Officiers de la Couronne: & qui plus est par l'assemblée generale des trois Estats du Royaume: Tellement que ce seroit vn erreur manifeste de reuôquer en doute le pouuoir de la Royne & la validité du traité, puisque tout le Royaume ensemble l'a confirmé & tenu pour bon, valable & légitime.

Quant à l'autre poinct touchant le differemét du mariage jusqu'après la puberté du Roy. Je sçay bien que régulièrement les promesses faictes auant cest aage ont leur effect suspensif iusqu'après ledit aage de puberté; que les parties contrahantes ont acquis le jugement plus fort & solide

pour rejeter, si bon leur semble, le mariage ou bien y apporter vn valide & legitime consentement quiluy donne la forme essentielle, aussi qu'auparavant cest aage la vigueur, & force du corps n'est ordinairement suffisante ny capable pour paruenir à l'accomplissement d'iceluy.

Mais la loy qui s'observe pour les particuliers ne sert pas tousiours de regle pour les souuerains qui pour le bien & repos de leurs Estats, ou pour prendre l'occasion en main de les accroistre par alliances y peuuent quelquesfois deroger. Charles 7. fut bien marié en l'aage d'vnze ans à Marie fille de Loys Duc d'Anjou Roy de Sicille : ledit Charles maria aussi Loys son fils & successeur en l'aage de treze ans à Marguerite Stuard fille de Jacques Roy d'Ecosse tenuë pour Princesse d'excellente vertu.

Ce n'est pas quand cela arriue pour euidente vtilité (comme mesmes il aduient souuent entre particuliers) que la couche nuptiale soit permise aux conjoins auant leur puberté. Cela depend de la prudence des parents qui en ont la charge & la conduite de considerer leur vigueur, force & aptitude au mariage, & cōfesse bien que c'est tousiours le meilleur & le plus seur, si rien ne presse, d'attendre cest aage, non seulement par le defaut qui peut estre auparauant, mais pour oster le subject de repudiation qu'aucuns ont voulu autrefois prendre pour auoir leur mariage esté aduancé auant le temps requis & réglé par la loy de nos majeurs & constitutions de l'Eglise : l'en pourrois alleguer quelques exemples, quoy que rares, dont ie me passeray, n'en estant besoin au subject present.

Car ceste sage Princeſſe , aſſiſtée d'un bon Conſeil, ayant iugé que ce dernier aduis eſtoit le meilleur & plus à propos , n'auoit pas eu intention d'aduancer ce mariage par parole de preſent (comme ils diſent) auant la puberté du Roy & de l'Infante, les conuentions du traité y reſiſtent, par lequel la celebration en eſt différée apres leur aage nubil, comme auſſi l'eſſect s'en eſt enſuiuy juſques à preſent que leur puberté approche. Ce qui demonſtre clairement que quand bien elle euſt eſté amenée en France auparauant , comme ils en ont prins l'alarme : L'intention n'eſtoit pas toutesfois de preuenir la volonté de ſa Maieſté, ny faire accomplir leur mariage auant ceſt aage puis qu'il eſtoit renuoyé à leurs ans nubils qui eſt la puberté. Mais bien pour accouſtumer ceste jeune Prin-

cesse aux mœurs & langue du pays,
 & la nourrir en l'amitié de nostre
 Roy son futur espoux : Ainsi lisons
 nous que pour cest effect Marguerite
 de Frâce fille de Loys le Jeune estant
 fiancée à Henry fils de Henry Roy
 d'Angleterre & Duc de Normandie,
 fut enuoyée en Angleterre en atten-
 dant ses ans nubils, & de nostre tēps
 Marie Stuard Roynne d'Ecosse sous
 la parole donnée pour elle par la Roi-
 ne douairiere sa mere d'un futur ma-
 riage avec François second lors Dau-
 phin, fut amenée en France dès l'a-
 ge de quatre à cinq ans, & depuis fut
 mariée audit François tost apres qu'il
 eut atteint l'aage de quatorze ans.

Ayant donc la Roynne traicté ce ma-
 riage, & suspendu l'effect d'iceluy
 sous l'expectatiue de cest aage nubil
 qui est aujourd'huy fort proche: quel
 subiect de plainte? n'est-elle pas en

contraire grandement louable de
pouuoir que sa Majesté lors qu'elle
viendra en cet aage de puberté & ieune
adolescence, ait vne compagne &
legitime espouse qui le puisse retenir
en son amitié & diuertir d'autres fol-
les & illicites affections, estât les pre-
mieres amitez, selon le dire com-
mun, plus fortes & durables que les
autres.

Cen'est pas peu de retirer le Prince
du vice dès le commencement, le
liant & obligeant d'une sainte &
particuliere affection, comme nous
lisons que fut de sa femme Margue-
rite fille du Comte de Prouence ce
bon Roy S. Louys, duquel aujour-
d'huy le sang, le nom & le regne sem-
ble renaître en la personne de no-
stre Roy qui nous en augure aussi
les vertus & perfections semblables
D'autre part n'est-ce pas vne ambi-
tion

tion louable à la Royne, & vn bon
 heur à toute la France de voir ses en-
 fans pourueus durant son regne? en
 esperance qu'vn iour par la faueur du
 Ciel la lignée & propagatiō du sang
 de France sera plantée avec leur nom
 & leurs armes par toutes les parties
 de la terre.

Au reste quel mariage plus sorta-
 ble & conuenable eust-elle peu trou-
 uer à present en la Chrestienté. Les
 plus sages qui ont escript sur ce sub-
 ject ont dōné aduis qu'il falloit choi-
 sir pour femme celle que l'on verroit
 correspondante de tous poincts en
 parité & equalité, s'il estoit possible.
 S'en peut-il remarquer de mieux pro-
 portionnée en toutes sortes, soit pour
 le faict de la religion, l'aage, le tiltre
 & grādeur de la maison, & les mœurs
 corespondantes à leur ieunesse desia
 poussez d'vne mesme affection de

s'entreuoir & paruenir à l'effect dudit mariage.

Et si nous pouuons dire avec vérité, que c'estoit au temps vne grande prudence à la Roynne de traicter ceste alliance, en ceste dure saison que la France estoit en dueil, comme orpheline apres le decès de son grand Henry qui naguères l'auoit tirée du naufrage. Ou lors ceste Princesse auoit beaucoup de peine à contenter tout le monde, & prendre garde sur plusieurs aduis de diuers partis & facliōs qui sembloient se preparer en l'Estat ayant subject de craindre, ce pendāt que l'estranger print occasion d'attaquer la France qui sembloit non seulement desolée, mais affoiblie. Tellement que ce n'estoit pas peu de se mettre à couuert pour ceregard sous le traicté de ceste alliance, demeurant par ce moyen en sa main les forces

qu'elle pouuoit auoit pour s'opposer au dedans contre les mouuemens qui pourroient arriuer en l'Estat, & qui le- roient suruenus depuis : joinct que l'appuy de ceste alliance pouuoit apporter de l'ôbrage à ceux qui se vou- droient éleuer, qu'en cas de necessité elle seroit secouruë de ceste part.

Pour troisieme objection ces cen- seurs disent que les conuentions du traicté ne sont honorables, mais pre- iudiciables & desaduantageuses au Roy & à la France.

Et pour donner quelque couleur à leur dire, ne se sont cõtêtez de metre enauant ce qui est de la verité du trai- cté touchant la renonciation faicte aux Estats d'Espagne: Mais scachant que le bruiet merueilleux qu'ils en font retentir est sans raison (comme il sera remonstré) il ont faict courir autre bruiet d'yne supposée renon-

ciaſion dont la calomnie ſera repreſentée cy apres.

Pour celle portée par le traité il eſt facile de remonſtrer que le mal n'en eſt paſtel qu'ils ſe veulent faire à croire, & qu'il y a bien à dire. Car premièrement quel ſujet de plainte, quand par les conuentions du double mariage la loy eſt elcale? Madame par la loy des François ne peut ſucceder au Royaume. Pourquoi trouuent-il eſtrange ſi l'Eſpagnol veut faire obſeruer celte meſme loy à l'endroiect de ſa fille.

Et toutesfois à le bien prendre, il y a bien difference en l'aduantage qui peut arriuer aux François par le moyé du mariage au prix de celuy que l'Eſpagne en peut eſperer: Car par la loy Salique qui a paſſé en loy naturelle par vne continuelle obſeruation depuis le commencement de ceste Mo-

narchie, les femelles ne peuuent succeder à ceste Couronne. Et au contraire la loy d'Espagne y appelle la fille aisnée au deffaut de masses; laquelle loy il n'est pas bien aisé de corrompre non plus que nostre loy fondamentale qui fit declarer Philippes de Valois Roy, au prejudice d'Edouard second Roy d'Angleterre & de Marguerite sa femme, fille de Philippes le Bel, & reietter aussi l'vzurpation que pretendoit faire Henry V. d'Angleterre, sous pretexte des conventions à luy accordées contre les loix du Royaume par Charles V. l. traitant le mariage de sa fille Catherine avecque ledict Henry. Jean Roy d'Angleterre ayant esté depossédé de son Royaume, & Loys fils de nostre Philippes Auguste estably en son lieu ledit Jean mort, l'animosité des Anglois meurt aussi, l'amour du sang

de leur Prince naturel renaist en son
 fils nommé Henry qui fut par eux re-
 ceu, & ledit Loys renuoyé en France.
 Charles le Simple ayant aussi esté de-
 possédé de ce Royaume, auquel il fut
 contraint de renoncer en la faueur de
 Raoul qui regna long temps en son
 lieu, estant mort Louys fils dudit
 Charles que sa mere Origene fille
 d'Edouart auoit sauué en Angleterte,
 fut rappellé & déclaré Roy par les
 François, nonobstant la renontia-
 tion de son pere, & de là fut appellé
 Louys d'Outremer.

Ces exemples & autres que l'on
 pourroit alleguer à ce propos seruent
 pour monstrier que les peuples aimēt
 naturellement le sang & la domina-
 tion de leurs legitimes successeurs, &
 l'obseruation des loix de leur patrie,
 esquelles ils sont nez sans s'arrester ny
 entrer en cognoissance de cause des

pactions ou renonciations faictes au contraire. Et partant qu'il n'est pas inconuenient que s'il y auoit ouuerture pour l'Infante ou ses descendans a pretendre les Estats d'Espagne, elle ny fut assistée & rappelée par les peuples du pays qui ont, comme les autres nations, les loix de leur patrie naturellement infuses dans leurs cœurs pour la recognoistre & rejeter ceux qui voudroient vsurper le droict du Royaume par son exclusion. Et lors selon leur assistance & les moyens qu'il plairoit à Dieu nous mettre en main feroit le moyé de ioindre par sa faueur l'Espagne à la France appuyez d'un droict si apparent & legitime, auquel sa Majesté & l'Infante (qui mesmes sont mineurs d'as) n'auroiēt peu renoncer par telles conuentions reproüuées de droict, au prejudice des loix publiques du Royaume.

C'est pourquoy l'on tient qu'aucuns du Conseil d'Espagne entrans sur ces considerations auroient apporté aurtout ou plus de difficulté pour conclure le traicté du mariage, que pouroient faire ces nouveaux censeurs, lesquels toutesfois ne peuuent ou plustost ne veulent recognoistre cest aduantage que l'on peut esperer estans preoccupez de trop grande passion.

Ce n'est pas (quoy que nous en dyons) pour en faire estat ny pour y penser. Le mariagen'a aussi esté faict à ceste intention ny sous l'esperance de la fortune des ciecles aduenir qui regarde nos successeurs ; & qui depend de la diuine prouidence de celuy qui donne les Couronnes à qui luy plaist : mais pour monstrier que par la conuention du traicté (quoy qu'elle doibue estre obseruée ayant donné

donné lieu au contract.) Nous auons plus de sujet, de contentement que de plainte, & plus d'apparence d'en esperer de l'aduantage pour la France, que du dommage & prejudice.

Aussi ces censeurs ne s'arrestas pas là: ils se sont aduisez,) croyât donner aux peuples plus de sujet de ressétimēt & de murmure) faire diuulguer vn faux bruit qui a couru long tēps, à sçauoir que l'o auoit fait renôcer à la Majesté aux droicts qu'elle pouuoit auoir & pretēdre tāt sur la haute Nauarre que ailleurs : & toutesfois il n'y en a mot par le traité. Mais ayant recogneu cet erreur populaire, non encore deraciné de l'opiniō de tous, i'ay pensé estre à propos d'en toucher vn mot afin de rendre curieux ceux qui doutroient de la verité de s'en esclarcir, & ne se laisser plus emporter aux bruits de la calomnie semez à plaisir pour abu-

ser & seduire les peuples.

Que pouroient aussi seruir telles renonciations? Qui peut douter qu'elles ne fussent inutilement faites, & que ne fussions tousiours receuables à rétrier en nos droicts, quand au Ciele aduenir l'occasion s'en presenteroit en main.

Non seulement pour la minorité du Roy ou par ce que tels droicts seroient inalienables. Mais d'autant que nous tenons pour maxime veritable que tout possesseur de mauuaise foy ne peut acquerir droict de prescription par le laps de temps quelque renociation qu'il puisse pratiquer s'il ne purge le vice de son iniuste detention en quitant la possession auparavant, n'estant autrement le consentement de celuy qui renonce en ce cas tenu pour legitime ny volontaire.

Pour quatriesme objection ils

disent, que Henry le Grand desiroit
 entendre à l'alliance de Sauoye, non
 à celle d'Espagne tenuë pour suspe-
 cte & ennemie. A quoy ie respôs, que
 pleust à Dien que ce grand Herculle
 fust viuant & en estat de pouuoir exé-
 cuter ses grands desseins, car comme
 luy seul estoit capable de les entre-
 prendre & conceuoir, il n'apparte-
 noit qu'à luy seul de les executer: mais
 si par raisons d'Estat pour paruenir
 & faciliter ses hautes entreprises, l'al-
 liance de Sauoye s'estoit proposée, la
 cause cessant l'effect peut cesser aussi,
 encor qu'il ne soit pas bien aisé de
 croire qu'il eust voulu bailler sa fille
 aînée à vn Duc de Sauoye au préju-
 dice de deux grands Roys ses voisins
 car pour en auoir parlé ce n'estoit pas
 chose faicte. Charles Duc de Bour-
 gogne, & François Duc de Breta-
 gne estans en guerre, chacun d'eux

promettoit sa fille à plusieurs qui ne pouuoient donner qu'à vn. Ce grand Henry auoit esté aussi en propos avec plusieurs autres auant que marier Madame sa sœur à Monsieur de Lorraine: L'on tient mesmes que le Prince ds Galles ne s'attendoit pas moins à Madame que le Prince de Piedmont: Quoy que ce soit pour en parler saincment & sans passion, Madame fille aînée de France n'auroit-elle pas subject de se plaindre de la Royne sa mere, voire la France de luy en faire reproche: Si auourd'huy en l'estat que sont les affaires elle faisoit eslection pour elle de la fortune de Sauoye au lieu de celle d'Espagne; Estât assez notoire quelle difference il y a auourd'huy de qualité, de rang & de grandeur entre ces deux Estats.

Dauantage ceste alliance de Sauoye dont ils veulent parler ne regarde

que la personne de Madame. Mais pour le Roy, dont ils ne parlent point quelle femme luy pourroient-ils donner à present plus sortable & mieux proportionnée en routes fortes de paritez & qualitez, comme il a esté cy dessus représenté.

Au reste, est-ce la premiere alliance avecquel'Espagne? Nous lisons que Chilperic second espousa Galfonde fille d'Espagne dès l'an 554. Depuis ceste alliance a esté renouvelée par des plus grands & signalez de nos Roys, Charles le Magne, Louys huitiesme & François premier.

A quel propos donc de reiecter ceste alliance comme suspecte, puis que tât de braues Roys (que le nostre desire imiter) l'ont recherchée, & plusieurs d'eux, la Majesté mesme & les Princes de son sang (race de Saint Loys) en sont descendus, que toute la Fran-

ce représentée par le corps des Estats
l'a consentie & approuvée pour le
bien & repos du Royaume: Qui peut
donc en auoir suspitió que quelques
particuliers qui se sentent interessez
en icelle & peut estre sans raison.

C'est ce que disoit Phocion Athe-
nien, que le bien d'un Estat & la vo-
lonté de tous les peuples ne s'accor-
dent iamais, estant bien difficile de
ranger vn chacun sous les loix du
debuoir & obeissance sans le mes-
cótentement & interest de quelques
particuliers qui ne sont cósiderables
contre le bien d'une republique.

Qui ne voit aussi que ces céseurs ten-
dent plustost à leur particulier qu'au
bien general, & que le bruit de la
crainte imaginaire qu'ils font semer
parmi le peuple ne leur sert que de
pretexte, n'estant en effect que des
songes & des chimaires.

Car qui croira que le Roy vueille introduire l'Espagnol en se mariant non plus que les predecesseurs ont fait, non plus aussi que l'Espagnol fera le François? La crainte & defiance seroit-elle pas esgalle, sinon que ces mesians qui proposent des terreurs panni-ques vueillent dire que l'Espagnol soit plus vaillât & prudent que le François pour sa conseruation, derobant l'honneur deu à la France qui a je ne sçay quoy de plus excellent & releué en toutes qualitez vertueuses que les autres nations.

A quel propos aussi de tenir pour ennemis ceux avec lesquels vous auez la paix? quelle difference en ce faisant entre la paix & la guerre? l'amy & l'ennemy? Il ne faut pas que les inimitiez soient immortelles & hereditaires aux successeurs d'un Estat: c'est vne prudence de les estaindre &

se rallier pour acquerir le repos, & ne faut pas aussi tenir pour ennemis ceux qui sont reconciliez: Si vous ne voulez perdre le tiltre de Chrestien, & ne soyez pires que les Turcs & Barbares ou les Margajats & Topinamboous qui s'entremangent continuellement.

Si l'alliance de tous ceux qui ont fait la guerre à la France estoit suspecte comme ennemis, nonobstant les traitez de paix, Quel party pourroit trouver le Roy pour s'allier en la Chrestienté: Seroit-ce avec l'Empire? Non; Car combié de pertes a receu la France pédant les guerres d'Allemagne & d'Italie sous le regne de l'Empereur Charles le Quint, Seroit-ce avec l'Anglois? nullement, ayant esté tenu pour nostre ancié ennemy, qui vsurpe encore iniustemen le tiltre de ceste Couróne: Avec les Suisses? aussi peu.

peu, nous ayant liuré (comme ennemis) deux grandes batailles à Nouarre & Mariguen; Seroir-ce donc avec la Sauoye, en cormoins, quand apres auoir vsurpé le Marquisat de Saluce il l'a fallu contraindre avec force d'armes d'en faire recompence.

Mais ie veux que la guerre soit encore ouuerte avec l'Espagnol, seroit-ce pas vn traict de grande prudence d'acquérir la paix & faire cesser le trouble par le moyen d'une bonne alliance. C'a esté souuent vn vray remede & salutaire pour apporter le repos aux Royaumes affligez & desolez. Les exemples en sont assez frequens par les histoires sans les représenter. Je me contéteray du plus recet qui peut seruir à nostre propos: c'est de l'alliance qui fut faite entre Henry second & Philippes dernier Roy des Espagnes. La loque continuatio

des guerres auoit grandement ruiné
 & trauaillé leurs Royaumes quaud
 pour leur repos & de leurs subjects,
 estans prests de donner bataille avec
 chacun yne forte & puissante armée,
 ils firent la paix à Chasteaucambresi
 en l'aunéc 1559. par le moien du ma-
 riage qui fut conclud entre ledit Phi-
 lippes & Madame Elizabeth fille aîs-
 née dudit Heuri. Et de là fut ladicte
 Elizabeth appelée par l'Espagnol
Dom Isabel de la Paz, laquelle paix de-
 meura ferme pendant le regne dudit
 Henry, & ses successeurs descendans
 de luy sans auoir esté enfrainte. Et
 qui plus est assista de secours le Roy
 Charles I X. pendant ses guerres ci-
 uiles.

Si depuis leur deceds Henry le Grád
 venant à la Couronne, non encore
 recogneu de tous les François. L'E-
 spagnol voyant nos diuisions & les di-

uers partis formez en l'Estat soubs diuers pretextes auroit voulu estant appelé au secours par l'un d'iceux, prendre occasion de faire des pratiques au Royaume. Aussi tost que les pretextes ont cessé que la reünion fut faicte de tous les subjects du Roy en son obeyssance, il traita la paix qu'il a obseruée pendant son regne; & depuis iusqu'à present. Et qui plus est, lors que les François ont esté affoibliz par la mort de leur grand Alcide, qu'ils auoiēt plustost sujet d'apprehender le trouble. Il a recherché leur alliance sans auoir rien entrepris cōtre nous pendāt la minorité du Roy, soit qu'il ait redouté la force & le courage des François, ou qu'il n'ait voulu controuenir au traicté de paix.

Quel subject donc de craindre à present que sa Majesté est accreuë d'aage, de iugement, de force & au-

thorité heureusement regnant en vn estat tranquille, aujourd'huy encor quel'Espagnol est obligé plus qu'au parauant à l'entretien & conseruatió de nostre amitié, non seulement par le droict des gens, pour l'alliance & cōfederation faicte de Prince à Prince, au moyen de la paix : mais par la loy du sang & de la nature, comme de frere à frere par le ferme lien d'vne double alliance; dont l'amitié vraysemblablement fera fidèlement entretenüe de part & d'autre, par ces deux grandes Princesses à l'endroit de leurs Maris) si que de leur regne, & de la vie des nostres, nous n'auons selon l'apparâce humaine subiect de craindre le trouble.

Pour finalle objection, ces censeurs alleguēt que par l'alliance d'Espagne celle des autres Princes & peuples cōfederés à la France fera rompuë.

Mais le Roy par le traicté de son mariage ne se depart de leur alliance, comme il leur a fait entendre si eux-mesmes se veullét despartir de la sienne, le tort sera de leur costé, n'ayant subject legitime de l'a rompre. Les mariages doiuent estre libres, & n'y a si chetif particulier qui ne s'en offensact luy en ostant la disposition. Seroit ce pas donc entreprendre vne espeece de domination sur sa Majesté que de vouloir brider son affectio & la regler à leur volonté en se mariant? Seroit-ce pas de primer l'autorité d'un grand Roy qui ne releue que de Dieu & de l'espée, s'il estoit contraint prendre la loy de ses voisins, luy qui l'a peut donner à tous; s'ils rompent & l'attaquent sera à leur dommage, suiuy d'un prompt repentir qui les contraindra de le rechercher.

Nous aurions plustost subject de

craindre si cōtre la foy publique (qui semble estre engagée) nous venions aujourdhuy à manquer sans cause. L'Espagnol print occasion de nous declarer la guerre au lieu de la paix, & du repos que nous désirons en nos iours. C'est là où nous attendent ces censeurs & prétendus zelateurs de la France qui nous voudroiet voir des-ia aux mains, croyant aduancer leurs desseins par nos miseres.

Mais les maux du passé rapportez par l'histoire que telles guerres ont causé au Royaume doiuent seruir d'exemple pour retrâcher l'occasion d'y retomber s'il est possible. Les fureurs de Mars sont plaines d'horreur: Les fruits del'oliue sont doux & delectables qui feront remplir la France de graces & benedictiōs cœlestes, estant restablie en son ancienne splendeur, force & autorité par vne longue

paix que nous deuons esperer sous
la faueur du Ciel, par la force & vnion
de ceste double alliance.

C'est là le but où doiuent tendre
tous les gens de bien. Et toutesfois
ces cœurs & ennemis du repos sous
ombre de ceste crainte imaginaire
ont tasché d'aliener les affections, non
seulement du commun; ains des plus
grands & principaux de la France,
voire de Monsieur le Prince, ainsi
que i'ay entendu: mais luy que le Ciel
a orné d'un esprit excellent & de fort
iugement, peut considerer que sous
le faux & specieux pretexte est sou-
uent couuert le poison, comme le
serpent se cache quelque fois sous les
belles fleurs pour ietter son venin qui
n'y prend garde.

Ce grand Prince ne peut ignorer
combien il importe à sa grandeur
d'assister sa Majesté en un acte si grand.

& si celebre qui a esté conclud & arresté par son aduis : Qu'il n'est pas bon d'irriter son Roy. Queluy rendant ceste assistance il luy en sçaura tousiours gré croissant d'aage & de jugement, & qu'autrement il pourroit vn iour luy en faire reproche venant à manquer.

Les rayons du grand Astre cœleste sont deluy inseparables, & suiuent sa course ordinaire, ne pouuant empescher son mouuement : Bien vray est que ceux qui sur nostre horison s'approchent immediatemēt deluy comme de leur principe ont plus de force & de clarté que les autres cy bas esloignez. Luy aussi qui tire sa lumiere & son lustre de ceste grande Majesté Royale estant prest de sa personne paroistra en la perfection de son excellence, & autrement elle sera diminuée & obscurcie par son esloignement

ment. La Cour (c'est à dire la presence du Roy) estant le Ciel où les Princes comme les Astres luisent & paroissent chacun en leur degré.

L'experience maistresse des choses luy peut faire croire la verité de mon dire, par l'exemple de ses predecesseurs, lors que par leur absence ils ont esté esloignez des bonnes graces de leurs Roys, Ce que ie m'advance de représenter (jaloux de voir conseruer le rang & l'honneur deu au Sang de France, & à luy particulièrement comme le premier (afin que l'exéple d'autrui adueni en la personne des siens luy puisse seruir d'antidotte contre toutes sortes d'inductiōs & propositions qui se pourroient faire au contraire, pour le destourner, & esbranler sa fermeté: Estant aussi bien vray semblable, que reglant & accommodant ses affections aux bonnes & saines intentions de leurs Majestez, leur

faisant recognoistre sa constance n'a-
 uoir peu estre esbranlée ny diuertie
 du deuoir qu'il doit au Roy son Sou-
 uerain, l'honneur & respect deu à la
 Roynes sa mere, il en doit esperer avec
 le temps plus d'honneur & de gloire
 qu'il n'en peut desirer. Et qui plus est
 vne ame contente, pure & nette de
 tout scrupulle en sa conscience, avec
 vne bien-veillance & louange im-
 mortelle de tous les peuples.

Je diray encor pour fin de mon dis-
 cours qu'aucuns de ces censeurs ont
 voulu aussi donner de l'ombrage à
 ceux de la Religion pretenduë refor-
 mée, lesquels ont descouuert leur ru-
 ses & artifice. Car tel de Religion cō-
 traire qui voudroit bien les pousser
 au trouble, desireroit leur ruyne. Tel
 autre qui n'a pour but de ses intentiōs
 que son ambition & interest particu-
 lier, se couure du zele de leur Reli-

gion pour les attirer.

Mais eux iouyffans d'une liberté entiere, & des honneurs & charges du Royaume, où ils sont receus & employez esgalemment sans defiance, suiuant les Edicts faits en leur faueur, ils ne voudront iamais (estans bien aduisez) suiuir les passions iniustes & les conseils pernicioeux qui pourroient apporter du trouble en leur repos & felicité: Estant vne grande prudence de les conseruer, leur estans acquis. Ce qu'ils ne pourroient faire se ben- dans contre leur Roy & leur conser- uateur tout ensemble.

Considerant principalement que leurs Majestez tesmoignent iournal- lement par ce qui se passe la sincere intention qu'ils ont de faire obseruer religieusement lesdits Edicts faicts par ce grand Henry & ses predecesseurs, pour grâdes considerations concer-

nâs le repos du Royaume: Nous ayâs les exēples du passé appris que la Foy (qui est vn don de Dieu) ne s'imprime en l'ame par la force du glaive, mais de la parole qui par l'ouye est conduite en l'intellect seul capable de la recevoir.

Il ne faut pas donc croire que ceste alliance qui n'a rien de commun avec le gouuernemēt du Royaume y puisse rien innouer.

Nous auons nos loix & nos reigles d'Estat (comme les autres natiōs) qui nous fōt viure en paix, & maintiēēt le repos vniuersel des peuples: il n'y a donc sorte d'alliance au monde qui les doiue faire corrompre ny violer pour apporter le trouble mais les entretenir, afin de demeurer tous vnīs en paix comme nous sommes sous le Sceptre & authoritē d'vn mesme Roy pere commun & cōseruateur de tous

ses subiects indifferemment qui tous
aussi d'un commun accord deuons
prier le Tout-puissant luy accroistre
tellement ses graces & benedictions
que de sa Race seconde & heroïque
il face naistre autant de Cæsars, Char-
lemagnes & de Grands Henrys qu'il
est necessaire pour gouuerner & com-
mander à tout l'Vniuers, & par leurs
victoires & trophées y rendre immor-
tel le Lys, le Nom & les Armes de la
France.

F I N.

Handwritten text, likely bleed-through from the reverse side of the page. The text is mostly illegible due to fading and the quality of the scan, but appears to be organized into several lines of prose.

